

Die Plattdütsche Kring

Dor staht wi för in!

Vörsitter

Rudi Timphus
Vor dem Kloster 3
49439 Mühlen
Tel.: 05492 / 2156

stv. Vörsitterin

Maria Blömer
Falkenberg
49681 Garrel
Tel.: 04474 / 8246

Schriewüppste

Alfred Kuhlmann
Schlehdornweg 10b
49424 Ellenstedt

Bisitter

Bernd Grieshop
Kirchstraße 17
49685 Höltinghausen

Bisitter

Wilhelm Thien
Richardstraße 2
49624 Lönigen

**Dormit use plattdütsche Spraoke uck in 2009 ünner
dei Lüe kummp, schall dor inne Medien faoken wat
up Platt tau hörn un tau läsen wän.**



Dei Plattdütsche Kring

in 'n

Heimatbund för 't Ollenborger Münsterland

Wat staiht an

in 't Johr 2009 ?

Wat häff sick daon in 't Johr 2008 ?

Siet Anfang 2007 aorbeit't dei Plattd. Kring mit Prof. Dr. Kürschner van die „Uni“ in Vechte tauhope. Dorbi güng dat üm dei Rechtschriewrägeln in Plattdütsch. Un dei schull'n in **dat Plattdütsche Wörbauk** inflaiten. Prof. Dr. Kürschner häff us holpen, dormit dat Wörbauk nao Inhalt un Form vör dei Wätenskupen bestaohn kann. Eigentlich har dat Wörbauk in 't Johr 2008 farig wän schullt. Aower nu schall dat doch noch in't Johr 2009 klappen.

Hildegard Tölke häff ehr 2. plattdütsche Bauk för dei Grundschaulen herutgäwen. Nao „**Mit Plattdütsch wess du klauk**“ häff sei in 't Johr 2008 „**Mit Plattdütsch bliffs du klauk**“ up 'n Markt bröcht. Un dei Schaulen in 't ganze Ollenborger Münsterland sünd dor scharp up.

Dat „Plattdütsche Johr 2008“ häff Gollenste äowernaahmen. Dorför sünd wi BGM Willibald Meyer dankbor. Bi dei „Halwtied“ in Gollenste wörn dei Bundes- un Landespolitikers verträen.

Dat „Bündnis för use Platt“ mit dei „OV“ löpp un löpp un kumpp tüschken Hüüsen best an.

Use Plattdütschen Kringversammlungen häbht wi an 'n 9. April 2008 un an 'n 1. Okt. 2008 dörtrocken. Beide Maole wörn wi in 't Cafe „Zum Göpel“ inne Gemeinde Visbek (Haogstä). Dorbi häbht wi uck an use Kringlüe dacht, wecke 2008 starben sünd: **Heinz Strickmann, Bernd Thie, Frank Deux.**

Usen Familendag häbht wi an 'n 27.08.2008 in Gollenste in 't „Haus im Moor“ hat. Dorbi häbht wi uck 'ne Rundfaohrt dör 't Mauer maakt.

Dei Plattdütsche Spraokendag is alltied an'n 26. September. An den Dag schäölt dei Heimatvereine off die plattdütschen Frönde Aktionen in ehre Dörper starten. Dat is uck, wo man dat inne Presse saihn kunn, hier un dor anpackt wörn. An 'n 27. September, bi dei „Halwtied“ van 't Plattdütsche Johr in Gollenste, stünd dei plattdütsche Spraoke ganz vörn an, un uck an'n 28. September 2008 in 't Museumsdörp.

Ganz vörn an stünd in 't Johr 2008, un dat häff us önlick vöranbröcht, **dat Plattdütsch-Seminaor** anne „Uni“ in Vechte 116 Studenten sünd an'n 3. Oktober anfangen, un aal häbht sei dat dörstaohn. 14 maol sünd wi bit taun Semesterschluss an 'n 2. Febr. 2009 tauhope kaomen. Jedet Maol för 2 Stunn'n, einmaol sogor för 4 Stunn'n. Dei Leitung van dat Seminaor har Prof. Dr. Wilfried Kürschner; Inhaber des Lehrstuhls für allgemeine Sprachwissenschaft und Germanistische Linguistik.

Wat staiht an in 't Johr 2009 ?

Düssen Fröhjohr staiht wedder die **Plattdütsche Läsewettbewerb** an. För den Kreis Cloppenburg is Maria Blömer ut Falkenborg taustännig und för den Kreis Vechte Fr.-Jos. Göttke ut Baok'n. Dei Schaul'n häbht dei Termine all fasteleggt.

Dat Plattdütsche Johr 2009 äowernemmp dei Stadt Dinklaoge. Dat is all för 3 Johr tausäggt wörn, un dortau staoht wi. In 2010 un 2011 (?) is dann dei Kreis Cloppenburg anne Riege.

Dat „Bündnis för use Platt“ inne OV löpp wieter.

Dei Kringversammlung düssen Fröhjohr häbht wi up 'n 25. März 2009 sett't, dor wedd dann uck dei Termin för 'n Harwst mit dei Kringlüe fasteleggt.

Dei Familendag schall an 'n 02. Sept. 2009 in Augustendörp wäsen. Dor willt wi us dat naie „Wasserwerk“ ankieken.

Dat **Plattdütsche Wörbauk** schall dit Johr rutbröcht wern, un use Lüe sünd uck all bi dat **Plattdütsche Liederbauk** an 't Warkeln.

Wi sett't hier uck all den Termin för den **Plattdütschen Spraokendag** in, dei Johr för Johr alltied an 'n 26. September is. An düssen Dag schäölt dei Heimatvereine un uck dei Schaul'n un dei Kinnergörens wat in Platt uppe Bein' stell'n.

Nao den Abschluss van 't Plattdütsch-Seminaor gaohet wi nun Tratt föt Tratt wieter. Mit den hütigen Dag, an'n 7. März 2009, willt wi dei Aktion **Hoch un Platt Siet' an Siet'** starten un dormit dei Lüe up dei Vördeile henwiesen, wenn dei Kinner „van 0 bit 8 Johr“ mit twei Spraoken upwassen daut. Un dor bütt sick bi us dei hochdütsche un die plattdütsche Spraoke an. Wi mäöt dei Lüe dat verklaorn, wo dat affloopen schall un mott. In Ostfreisland un uck in Holland sünd all Projekte loopen. Man häff fastestell't, dat twei Spraoken van lüttket off an masse Vördeile bringt.

Wi bruukt se aal, dormit sünd wi 2005 anträen, un nu – Tratt för Tratt – is dei Boden so wiet. Wi mäöt nu an 't Insaien kaomen. Dat gaiht nich van vandaoge up marn. Dei Öllern, Kinnergörens un Grundschaulen mäöt wi tauhope roopen. Un dann is uck dei Politik anne Riege. Wi mäöt dei Politikers dor up henwiesen, dat sei dei Europäische Charta för dei Regional- off Minderheitenspraoken uck in Neddersassen ünnerschräwen häbht.

Wo kann 't, dat wi alltied läsen daut, dat use Ollenborger Münsterland wirtschaftlich spitze is, wor in ganz Neddersassen kienein ankummp. In Ostfreisland sünd all hauptamtliche Kräfte vanne Gemeinden und Landkreise insett't wörn. Dor is all masse Geld för dei Pfläge van dat öllste Kulturgaut insett't wörn. Blot in 't Ollenborger Land dait sick nicks. Wo kann 't ?

Bildung bruukt mehr at blot den Ruum för Kinnerkrüppen, Kinnergörens un Grundschaulen. Bildung häff uck masse mit Didaktik un Methodik tau daun. Wi mäöt us also fraagen:

**Worüm maakt wi dat, un wo (wie!) maakt wi dat ?
Dat is nu use Upgaowe. Dat mäöt wi dei Lüe verklaorn!**